

**UNDANG – UNDANG KECIL**

**CETAKAN SEMULA**

**UNDANG-UNDANG KECIL PELESENAN ANJING  
DAN RUMAH PEMBIAKAN ANJING  
(MAJLIS BANDARAYA SUBANG JAYA) 2007**

Mengandungi segala pindaan hingga 10 Disember 2020.

DITERBITKAN OLEH  
JABATAN UNDANG-UNDANG  
MAJLIS BANDARAYA SUBANG JAYA  
2021



AKTA KERAJAAN TEMPATAN 1976

UNDANG-UNDANG KECIL PELESENAN ANJING DAN  
RUMAH PEMBIAKAN ANJING  
(MAJLIS BANDARAYA SUBANG JAYA) 2007

---

SUSUNAN UNDANG-UNDANG KECIL

---

Undang -  
undang  
kecil

1. Nama, permulaan kuat kuasa dan pemakaian
2. Tafsiran
3. Pelesenan anjing
4. Daftar dan pengeluaran lesen
5. Pemakaian kolar anjing dan lencana
6. Kehilangan lencana
7. Pertukaran pemunyaan anjing berlesen
8. Sekatan yang dikenakan ke atas pemeliharaan anjing
9. Kehendak kebersihan berkenaan dengan pemeliharaan anjing
10. Perlindungan terhadap penganiayaan dan tindakan mudarat
11. Anjing berpenyakit
12. Mencegah penyakit anjing gila
13. Kacau ganggu kerana salakan tidak berhenti-henti, pembuangan najis dan selainnya
14. Anjing hendaklah diikat, dsb. Dan tidak dibenarkan berkeliaran
15. Serangan anjing, dsb.
16. Anjing merbahaya
17. Penangkapan atau pembinasaan anjing-anjing yang berkeliaran
18. Rumah pembiakan anjing hendaklah dilesenkan
19. Pengeluaran lesen
20. Kuasa untuk memasuki dan memeriksa
21. Penalti
22. Pendakwaan
23. Pengkompaunan kesalahan
24. Peruntukan pemansuhan dan peralihan

JADUAL

AKTA KERAJAAN TEMPATAN 1976

UNDANG-UNDANG KECIL PELESENAN ANJING DAN RUMAH  
PEMBIAKAN ANJING (MAJLIS BANDARAYA SUBANG JAYA)  
2007

PADA menjalankan kuasa yang diberi oleh seksyen 73 dan 102A Akta Kerajaan Tempatan 1976 [*Akta 171*], Majlis Bandaraya Subang Jaya membuat dan menurut seksyen 103 Akta tersebut Pihak Berkuasa Negeri mengesahkan undang-undang kecil yang berikut:

**Nama, permulaan kuat kuasa dan pemakaian**

1. (1) Undang-undang kecil ini bolehlah dinamakan **Undang-Undang Kecil Pelesenan Anjing dan Rumah Pembiakan Anjing (Majlis Bandaraya Subang Jaya) 2007**.

(2) Undang-Undang Kecil ini mula berkuat kuasa pada 19 Julai 2007.

(3) Undang-Undang Kecil ini hendaklah terpakai hanya bagi kawasan pentadbiran Majlis Bandaraya Subang Jaya sahaja.

**Tafsiran**

2. Dalam Undang-Undang Kecil ini, melainkan jika konteksnya menghendaki makna yang lain-

“anjing berlesen” ertinya anjing yang dilesenkan di bawah undang-undang kecil 4;

“Datuk Bandar” ertinya Datuk Bandar Majlis Bandaraya Subang Jaya;

“doktor veterinar” ertinya doktor veterinar sebagaimana yang ditakrifkan dalam seksyen 2 Akta Doktor Veterinar 1974 [*Akta 147*];

“lencana” ertinya lencana seperti yang dinyatakan dalam subperenggan 4(2)(c);

“Majlis” ertinya Majlis Bandaraya Subang Jaya;

“pegawai diberi kuasa” ertinya mana-mana pegawai yang diberi kuasa secara bertulis oleh Datuk Bandar ;

“pemunya” berhubungan dengan seekor anjing, termasuklah mana-mana orang yang menjaga atau mempunyai kawalan ke atas anjing itu;

“Pihak Berkuasa Melesen” ertinya Datuk Bandar atau Setiausaha suatu pihak berkuasa tempatan atau mana-mana pegawai yang diberi kuasa secara bertulis oleh Datuk Bandar;

“rumah pembiakan anjing” ertinya mana-mana bangunan, pegangan atau premis di mana suatu pengusahaan yang berkaitan dengan pemeliharaan, pembiakan, penyimpanan atau latihan anjing dijalankan bagi maksud-maksud komersial.

“Datuk Bandar” ertinya Datuk Bandar Majlis Bandaraya Subang Jaya.

### **Pelesenan anjing**

3. (1) Tiada seorang pun boleh mempunyai, memelihara atau melindungi seseekor anjing yang telah mencapai umur tiga bulan melainkan jika anjing itu dilesenkan di bawah Undang-Undang Kecil ini.

(2) Suatu permohonan untuk lesen hendaklah dibuat kepada Pihak Berkuasa Melesen dalam apa-apa bentuk sebagaimana yang ditetapkan dan hendaklah disertakan dengan fi sebanyak sepuluh ringgit.

(3) Suatu lesen hendaklah habis tempohnya pada 31 Disember pada tahun lesen itu dikeluarkan.

### **Daftar dan pengeluaran lesen**

4. (1) Pihak Berkuasa Melesen hendaklah menyimpan dan menyenggarakan, dalam apa-apa bentuk difikirkan patut; apa-apa daftar yang difikirkannya perlu bagi maksud-maksud Undang-Undang Kecil ini.

(2) Selepas menerima suatu permohonan untuk lesen dan fi yang dinyatakan, Pihak Berkuasa Melesen hendaklah-

- (a) mendaftarkan anjing itu dengan membuat suatu catatan dalam daftar yang menghuraikan butir-butir anjing yang hendak dilesenkan dan nama serta alamat pemunya;
- (b) menguntukkan nombor pendaftaran bagi anjing itu;
- (c) mengeluarkan kepada pemunya anjing itu suatu lesen dalam bentuk lencana yang sesuai yang mempunyai nombor siri yang sama dengan nombor pendaftaran anjing itu; dan
- (d) mengeluarkan kepada pemunya anjing itu suatu resit bagi fi yang telah dibayar.

### **Pemakaian kolar anjing dan lencana**

5. Pemunya seekor anjing berlesen hendaklah mengadakan kolar yang sesuai untuk dipakai oleh anjing itu pada setiap masa dan lencana yang dikeluarkan di bawah undang-undang kecil 4 hendaklah dipasang dengan sempurna pada kolar itu mengikut cara yang membolehkan anjing itu dilihat dengan jelas apabila kolar itu dipakai oleh anjing itu.

### **Kehilangan lencana**

6. Jika suatu lencana yang dikeluarkan di bawah undang-undang kecil 4 hilang, pemunya anjing yang dilesenkan di bawah undang-undang kecil itu hendaklah mendapatkan lesen yang lain mengikut peruntukan-peruntukan undang-undang kecil 4 sebagai gantian.

### **Pertukaran pemunyaan anjing berlesen**

7. Jika terdapat suatu pertukaran pemunyaan anjing seekor anjing berlesen, pemunya yang baru hendaklah, dalam tempoh satu bulan dari pertukaran itu, memberitahu Pihak Berkuasa Melesen mengenai pertukaran sedemikian dan Pihak Berkuasa Melesen hendaklah mencatatkan nama dan alamat pemunya baru itu dalam daftar bayaran dengan bayaran fi pendaftaran sebanyak lima ringgit.

### **Sekatan yang dikenakan ke atas pemeliharaan anjing**

8. (1) Tanpa menjejaskan undang-undang kecil 3, tiada seorang pun boleh mempunyai, memelihara, melindungi atau membenarkan dipelihara atau dilindungi –

(a) lebih daripada dua ekor anjing di premisnya yang mempunyai keluasan seribu meter persegi atau kurang; atau

(b) lebih daripada empat ekor anjing di premisnya yang mempunyai keluasan melebihi seribu meter persegi

(2) Tiada seorang pun boleh mempunyai, memelihara, melindungi atau membenarkan dipelihara atau dilindungi seekor anjing di tingkat yang lebih tinggi daripada tingkat bawah sesuatu bangunan.

### **Kehendak kebersihan berkenaan dengan pemeliharaan anjing**

9. (1) Pemunya seekor anjing berlesen hendaklah memastikan bahawa anjing itu dan tempat di mana anjing itu dipelihara disenggarakan dalam keadaan bersih pada setiap masa.

(2) Pemunya seekor anjing berlesen hendaklah membuang apa-apa bahan najis anjing itu daripada premisnya dan pembuangan bahan najis sedemikian hendaklah dijalankan mengikut cara atau melalui kaedah yang tidak berkemungkinan menyebabkan kesalahan atau kacau ganggu kepada mana-mana yang lain.

### **Perlindungan terhadap penganiayaan dan tindakan mudarat**

10. (1) Pemunya seekor anjing berlesen hendaklah memastikan bahawa anjing itu diberi makan dan disenggarakan dengan sempurna.

(2) Mana-mana orang yang –

- (a) dengan zalimnya memukul, menendang, memperlakukan secara kejam, menyiksa, menyebabkan kemarahan atau menakutkan mana-mana anjing berlesen, atau menyebabkan atau membenarkan anjing itu dipergunakan sedemikian, atau dengan sewenang-wenangnya atau dengan tidak munsabahnya melakukan atau tidak melakukan apa-apa perbuatan, menyebabkan kesakitan atau penderitaan yang tak perlu kepada anjing itu;
- (b) mengangkut, membawa atau membenarkan mana-mana anjing berlesen itu diangkut atau dibawa mengikut cara atau kedudukan yang menyebabkan kesakitan atau penderitaan yang tak perlu kepada anjing itu;
- (c) menyebabkan, mengakibatkan atau membantu dalam pelagaan mana-mana anjing berlesen; atau
- (d) tanpa apa-apa sebab atau alasan munasabah, memberi atau membenarkan diberi apa-apa ubat atau bahan beracun atau memudaratkan kepada mana-mana anjing berlesen, atau dengan sengaja menyebabkan apa-apa ubat atau bahan sedemikian dimakan oleh anjing itu,

maka orang itu adalah melakukan suatu kesalahan penganiayaan di bawah Undang-Undang Kecil ini.

(3) Bagi maksud-maksud Undang-Undang Kecil ini, seorang pemunya hendaklah disifatkan sebagai telah melakukan penganiayaan jika dia telah gagal menjalankan penjagaan dan penyeliaan yang munasabah untuk melindungi anjing itu daripada perbuatan-perbuatan yang dinyatakan dalam perenggan (2).

### **Anjing berpenyakit**

11. (1) Sekiranya seekor anjing berlesen berpenyakit, pemunya anjing itu hendaklah dengan segera membawa anjing itu untuk diperiksa dan dirawat oleh seorang doktor veterinar dan anjing itu boleh dibenarkan disimpan di premis pemunya melainkan jika anjing itu telah diperiksa dan dirawat oleh doktor veterinar itu walaupun masih dirawat oleh doktor veterinar itu, telah dibenarkan oleh doktor veterinar itu untuk disimpan di premis pemunya.

(2) Jika ternyata kepada Pihak Berkuasa Melesen bahawa seekor anjing berlesen mengalami apa-apa penyakit, Pihak Berkuasa Melesen boleh, melalui notis bertulis, menghendaki pemunya anjing itu membawa anjingnya untuk diperiksa oleh doktor veterinar dalam suatu tempoh yang dinyatakan di atas perbelanjaan pemunya.

(3) Jika mana-mana anjing berlesen telah diperiksa oleh seorang doktor veterinar di bawah perenggan (1) atau (2) dan doktor veterinar itu berpendapat bahawa anjing itu mengalami penyakit yang merbahaya kepada kesihatan dan kebajikan manusia atau haiwan, pemunya anjing sedemikian hendaklah dengan serta merta memberitahu Pihak Berkuasa Melesen mengenainya, dan Pihak Berkuasa Melesen boleh menyebabkan anjing itu ditangkap dan ditahan untuk pengasingan atau pembinaan untuk mencegah merebaknya apa-apa penyakit merbahaya sedemikian.

(4) Pihak Berkuasa Melesen boleh menahan anjing berlesen yang berpenyakit itu dalam pengasingan selama apa-apa tempoh yang perlu bagi mengawasi dan merawat anjing itu, dan jika dia berpuashati bahawa anjing itu tidak lagi berpenyakit, maka Pihak Berkuasa Melesen hendaklah memberitahu pemunya supaya mendapatkan kembali anjing itu dalam tempoh yang dinyatakan setelah membayar kos-kos yang ditanggung oleh Majlis bagi penahanan dan rawatan sedemikian.

(5) Jika anjing berlesen itu tidak didapatkan kembali oleh pemunya atau pemunya enggan membayar kos-kos yang ditanggung oleh Pihak Berkuasa Melesen di bawah perenggan (4), Pihak Berkuasa Melesen boleh menyebabkan anjing itu dijual, dibinasakan atau selainnya dilupuskan dan tiada pampasan kena dibayar kepada pemunya oleh Pihak Berkuasa Melesen.

(6) Jika Pihak Berkuasa Melesen berpuas hati bahawa adalah perlu bagi seekor anjing berlesen yang berpenyakit itu dibinasakan, dia hendaklah melupuskan bangkai anjing itu sebagaimana yang difikirkan patut dan tiada pampasan kena dibayar kepada pemunya bagi pembinasakan sedemikian.

### **Mencegah penyakit anjing gila**

12. Semua anjing hendaklah disuntik bagi mencegah penyakit anjing gila (Hydrofobia) sama ada oleh Pegawai Jabatan Haiwan Negeri Selangor atau lain-lain doktor veterinar.

### **Kacau ganggu kerana salakan tidak berhenti-henti, pembuangan najis dan selainnya**

13. (1) Pemunya seekor anjing berlesen hendaklah mengambil segala langkah perlu untuk memastikan bahawa anjing itu tidak menyebabkan apa-apa kacau ganggu, kepada kawasan persekitaran atau alam sekeliling, khususnya melalui salakan tidak berhenti-henti atau selainnya.

(2) Pemunya seekor anjing berlesen hendaklah mengambil segala langkah perlu untuk memastikan bahawa anjing itu tidak membuang najis atau kencing di tempat awam.

### **Anjing hendaklah diikat, dsb. dan tidak dibenarkan berkeliaran**

14. (1) Pemunya seekor anjing berlesen hendaklah memastikan bahawa anjing itu berada di bawah kawalan berkesan seseorang melalui tali ikatan atau rantai pada setiap masa apabila anjing itu dibawa keluar kepada premis pemunya.

(2) Pemunya seekor anjing berlesen hendaklah memastikan bahawa anjing itu tidak berkeliaran di luar premisnya.

### **Serangan anjing dsb.**

15. (1) Jika seekor anjing berlesen mengejar, menyerang atau menggigit mana-mana orang, sama ada atau tidak apa-apa kecederaan dilakukan, pemunya anjing itu adalah melakukan kesalahan.



(2) Tanpa menjejaskan perenggan (1), pemunya anjing itu adalah bertanggung untuk membayar ganti rugi bagi kecederaan yang dilakukan oleh anjing itu.

(3) Jika apa-apa kecederaan sedemikian telah dilakukan oleh seekor anjing berlesen dan wujudnya suatu keraguan tentang siapa pemunya anjing itu, penghuni mana-mana rumah atau premis di mana anjing dipelihara atau dibenarkan tinggal atau berada pada masa kecederaan itu hendaklah dianggap sebagai pemunya anjing itu, dan hendaklah bertanggung bagi kecederaan itu melainkan jika dia membuktikan bahawa dia bukanlah pemunya anjing sedemikian pada masa itu;

Dengan syarat bahawa jika terdapat lebih daripada seorang penghuni dalam mana-mana rumah atau premis yang mempunyai bilik atau tempat tinggal sewaan berasingan atau selainnya, penghuni bahagian tertentu atau premis itu yang di dalamnya anjing itu dipelihara atau dibenarkan untuk tinggal atau berada pada masa kecederaan itu hendaklah dianggap sebagai pemunya anjing sedemikian pada masa itu;

(4) Tiada pampasan kena dibayar kepada mana-mana orang di bawah Undang-Undang Kecil ini berkenaan dengan kecederaan yang dialami dalam mana-mana rumah atau premis kecuali atau bukti bahawa dia telah memasuki rumah atau premis sedemikian mengikut perjalanan biasa tugas-tugasnya atau dengan kebenaran nyata atau tersirat penghuni itu.

(5) Tiada liabiliti jenayah boleh berbangkit di bawah Undang-Undang Kecil ini berkenaan dengan apa-apa kecederaan yang dialami oleh mana-mana orang dalam mana-mana rumah atau premis melainkan jika seorang itu telah memasuki rumah atau premis sedemikian mengikut perjalanan biasa tugas-tugasnya atau dengan kebenaran nyata atau tersirat penghuni itu.

### **Anjing merbahaya**

16. (1) Pihak Berkuasa Melesen boleh mengambil maklum akan aduan bahawa seekor anjing berlesen adalah merbahaya dan tidak dipelihara di bawah kawalan sepatutnya.

(2) Jika ternyata kepada Pihak Berkuasa Melesen setelah mengambil maklum akan aduan itu bahawa anjing sedemikian adalah merbahaya, Pihak Berkuasa Melesen boleh membuat suatu perintah mengarahkan pemunya supaya memelihara anjing itu di bawah kawalan sepatutnya.

(3) Jika seekor anjing berlesen dibuktikan telah menyerang atau mencederakan mana-mana orang, anjing itu boleh dikira sebagai anjing merbahaya.

(4) Dalam Undang-Undang Kecil ini, seekor anjing berlesen disifatkan tidak dipelihara di bawah kawalan sepatutnya jika anjing itu tidak disarung mulutnya ataupun diikat dengan tali ikatan atau rantai.

(5) Jika pemunya gagal mematuhi perintah sebagaimana yang diarahkan oleh Pihak Berkuasa Melesen di bawah perenggan (2) atau jika telah dibuktikan bahawa anjing berlesen itu telah sekali lagi menyerang atau mencederakan mana-mana orang, Pihak Berkuasa Melesen boleh memerintahkan supaya anjing itu ditangkap dan dibinasakan, dan tiada pampasan kena dibayar oleh Pihak Berkuasa Melesen kepada pemunya kerana pembinasan itu.

### **Penangkapan atau pembinasaan anjing-anjing yang berkeliaran**

17. (1) Mana-mana anjing yang didapati berkeliaran di tempat awam atau mana-mana anjing yang tidak berlesen dijumpai di dalam mana-mana premis boleh ditangkap oleh Pihak Berkuasa Melesen dan ditahan sehinggalah pemunya anjing itu menuntutnya dan membayar fi yang dinyatakan dalam Jadual.

(2) Jika mana-mana anjing yang ditangkap mengikut Undang-Undang Kecil ini didapati adalah seekor anjing berlesen melalui lencana yang dipakainya, Pihak Berkuasa Melesen hendaklah menyampaikan kepada orang yang nama dan alamatnya telah dicatatkan dalam daftar sebagai pemunya suatu notis yang menyatakan bahawa anjing itu telah ditangkap dan akan dijual atau dibinasakan jika tidak dituntut dalam masa tujuh hari dari tarikh notis itu.

(3) Suatu notis di bawah Undang-Undang Kecil ini boleh disampaikan –

- (a) dengan menyerahkan notis bertulis itu kepada orang yang kepadanya notis itu hendaklah disampaikan;
- (b) dengan meninggalkan notis bertulis itu di alamat orang itu sebagaimana yang dinyatakan dalam daftar;
- (c) dengan menghantar notis bertulis melalui pos ke alamat orang itu sebagaimana yang dinyatakan dalam daftar; atau
- (d) dengan menyampaikan isi perkara notis itu melalui telefon, jika ada, sebagaimana yang dinyatakan dalam daftar.

(4) Jika mana-mana anjing yang ditangkap mengikut Undang-Undang Kecil ini –

- (a) telah ditahan –
  - (i) selama tujuh hari selepas penangkapannya; atau
  - (ii) dalam hal notis yang disampaikan mengikut perenggan (2), selama tujuh hari selepas notis itu disampaikan; dan
- (b) tidak dituntut oleh pemunya atau pemunya enggan membayar fi yang dinyatakan, maka Pihak Berkuasa Melesen boleh menyebabkan anjing itu dijual, dibinasakan atau selainnya dihapuskan.

(5) Pihak Berkuasa Melesen boleh menyebabkan seekor anjing yang ditangkap di bawah perenggan (1) dibinasakan sebaik sahaja ia ditangkap jika Pihak Berkuasa Melesen berpendapat bahawa anjing itu berada dalam suatu keadaan yang menghendaki anjing itu dibinasakan dengan serta-merta.

(6) Pihak Berkuasa Melesen tidaklah bertanggungjawab untuk membayar apa-apa pampasan kepada mana-mana pemunya bagi apa-apa kecederaan atau kematian mana-mana anjing semasa anjing itu ditahan.

(7) Pihak Berkuasa Melesen tidaklah bertanggung untuk membayar apa-apa pampasan kepada mana-mana pemunya bagi apa-apa jualan, pembinaan atau pelupusan mana-mana anjing di bawah perenggan (4) atau (5).

### **Rumah pembiakan anjing hendaklah dilesenkan**

18. (1) Tiada seorang pun boleh membina atau menggunakan mana-mana bangunan, pegangan atau premis sebagai rumah pembiakan anjing melainkan jika dilesenkan oleh Pihak Berkuasa Melesen di bawah Undang-Undang Kecil ini.

(2) Suatu permohonan lesen hendaklah dibuat dalam apa-apa bentuk sebagaimana yang diperuntukkan oleh Pihak Berkuasa Melesen dan pemohon boleh dikehendaki untuk mengemukakan keterangan menyokong bahawa notis sewajarnya mengenai rumah pembiakan anjing yang dicadangkan itu telah diberikan kepada mana-mana orang yang tinggal atau menduduki mana-mana bangunan atau premis dalam kawasan di mana terletak rumah pembiakan anjing itu, dan bahawa kegunaan tanah yang dicadangkan sedemikian mematuhi pelan pembangunan atau sesuatu kebenaran perancangan yang dibenarkan di bawah Akta Perancangan Bandar dan Desa 1976.

(3) Jika notis mengenai rumah pembiakan anjing dicadangkan itu sebagaimana yang tersebut dalam perenggan (2) dikehendaki diberikan, Pihak Berkuasa Melesen hendaklah mengambil kira apa-apa bantahan yang berbangkit.

(4) Untuk menentukan sama ada untuk meluluskan suatu permohonan untuk lesen, Pihak Berkuasa Melesen hendaklah secara khususnya, tetapi tanpa menjejaskan budi bicaranya untuk menahan lesen atas alasan lain, mengambil kira keperluan untuk memastikan –

- (a) bahawa anjing-anjing itu akan pada setiap masa disimpan di tempat tinggal yang sesuai berkenaan dengan saiz, pencahayaan, pengalihudaraan dan kebersihan;
- (b) bahawa anjing-anjing itu akan dibekalkan secukupnya dengan makan minum dan tempat tidur yang sesuai;
- (c) bahawa segala langkah munasabah akan diambil untuk mencegah merebaknya penyakit berjangkit di antara anjing-anjing itu, termasuk penyediaan kemudahan pengasingan yang mencukupi;
- (d) bahawa langkah-langkah yang berpatutan akan diambil dalam hal kebakaran dan kecemasan yang lain;
- (e) bahawa suatu daftar disimpan yang mengandungi perihalan mana-mana anjing yang dimasukkan ke dalam rumah pembiakan itu, tarikh kemasukan dan keluar, nama dan alamat pemunya, dan daftar sedemikian hendaklah sentiasa disediakan untuk pemeriksaan Pihak Berkuasa Melesen.

### **Pengeluaran lesen**

19. (1) Apabila permohonan diluluskan, fi lesen sebagaimana yang ditetapkan dalam Jadual hendaklah dibayar.

(2) Pihak Berkuasa Melesen hendaklah mengeluarkan lesen kepada pemohon, dengan atau tanpa syarat sebagaimana yang difikirkan perlu atau suai manfaat oleh Pihak Berkuasa Melesen untuk memastikan segala atau mana-mana perkara dalam undang-undang kecil 18(4) dan lesen itu adalah sah selama dua belas bulan dan boleh diperbaharui apabila fi yang ditetapkan dibayar tetapi boleh dibatalkan oleh Pihak Berkuasa Melesen pada bila-bila masa jika Pihak Berkuasa Melesen tidak berpuashati dengan perjalanan rumah pembiakan itu atau jika pemohon telah melanggar mana-mana syarat yang dikenakan.

### **Kuasa untuk memasuki dan memeriksa**

20. Bagi maksud menentukan sama ada suatu kesalahan telah dilakukan atau sedang dilakukan terhadap Undang-Undang Kecil ini, Pihak Berkuasa Melesen atau pegawai yang diberi kuasa boleh pada bila-bila masa yang munasabah memasuki dan memeriksa—

- (a) mana-mana, bangunan, pegangan atau premis di mana Pihak Berkuasa Melesen mempunyai sebab untuk mempercayai bahawa seseorang sedang menjalankan suatu rumah pembiakan anjing;
- (b) lesen untuk menjalankan rumah pembiakan anjing telah dipohonkan di bawah Undang-Undang Kecil ini;
- (c) mana-mana bangunan atau premis yang berkenaan dengannya suatu lesen yang telah diberikan mengikut peruntukan-peruntukan Undang-Undang Kecil ini sedang berkuatkuasa; atau
- (d) mana-mana bangunan atau premis yang berkenaan dengannya suatu kesalahan telah dilakukan di bawah Undang-Undang Kecil ini.

### **Penalti**

21. Mana-mana orang yang melanggar atau gagal untuk mematuhi mana-mana peruntukan Undang-Undang Kecil ini atau mana-mana syarat atau arahan atau perintah yang diberikan oleh Pihak Berkuasa Melesen adalah melakukan suatu kesalahan dan apabila disabitkan, boleh dikenakan denda tidak melebihi dua ribu ringgit atau penjara selama tempoh tidak melebihi satu tahun atau kedua-duanya.

### **Pendakwaan**

22. Tiada pendakwaan boleh dimulakan terhadap kesalahan di bawah Undang-Undang Kecil ini kecuali dengan izin bertulis Pendakwa Raya.

### **Pengkompaunan kesalahan**

23. (1) Datuk Bandar, Setiausaha atau Pegawai Undang Undang Majlis boleh mengkompaun mana-mana kesalahan yang dilakukan di bawah Undang-Undang Kecil ini dan ditetapkan sebagai kesalahan yang boleh dikompaun dengan membuat suatu tawaran bertulis kepada orang yang disyaki telah melakukan kesalahan itu untuk mengkompaun kesalahan itu apabila dibayar kepada Majlis sejumlah wang yang tidak melebihi satu ribu ringgit bagi kesalahan itu dalam tempoh yang dinyatakan dalam tawaran itu.

(2) Sesuatu tawaran di bawah perenggan (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan dan jika jumlah yang dinyatakan dalam tawaran itu tidak dibayar dalam tempoh yang dinyatakan dalam tawaran itu atau dalam apa apa tempoh lanjutan sebagaimana yang dibenarkan oleh Datuk Bandar, Setiausaha atau Pegawai Undang-Undang Majlis, pendakwaan terhadap kesalahan itu boleh dimulakan pada bila-bila masa selepas itu terhadap orang yang kepadanya tawaran itu telah dibuat

(3) Jika suatu kesalahan telah dikompaun di bawah perenggan (1), tiada pendakwaan boleh dimulakan selepas itu berkenaan dengan kesalahan itu terhadap orang yang kepadanya tawaran untuk mengkompaun telah dibuat dan apa-apa benda yang disita berkaitan dengan kesalahan itu melainkan ianya telah dilupuskan terdahulu hendaklah dilepaskan, tertakluk kepada apa-apa terma dan syarat yang berkaitan.

(4) Kesemua wang yang diterima di bawah Undang-Undang Kecil ini hendaklah dibayar kepada kumpulan wang yang diwujudkan di bawah mana-mana undang-undang yang berhubung dengan kerajaan tempatan.

### **Peruntukan pembatalan dan peralihan**

24. (1) Undang-undang Kecil Pelesenan Anjing (Majlis Daerah Petaling) 1994 adalah dengan ini dimansuhkan.

(2) Suatu lesen yang dikeluarkan di bawah Undang Undang Kecil termansuh itu yang belum habis tempohnya hendaklah terus berkuatkuasa dan mempunyai kuasa seolah-olah ia telah dikeluarkan di bawah Undang Undang Kecil ini.

(3) Apa apa notis, perintah kompaun, lesen atau dokumen yang telah dibuat atau dikeluarkan di bawah Undang Undang Kecil yang telah dimansuhkan ini atau yang dibuat dahulu hendaklah dianggap telah dibuat atau dikeluarkan di bawah Undang-Undang Kecil ini dan hendaklah terus terpakai sehingga dibatalkan.

**JADUAL**

(Undang-undang kecil 17 dan 19)

Caj untuk seekor anjing setiap hari – RM2.00

Fi lesen tahunan untuk rumah pembiakan anjing – RM150.00

Dibuat oleh Majlis Perbandaran Subang Jaya dalam mesyuarat pada 30 April 2007.

**ADNAN BIN HAJI MD IKSHAN**  
*Yang Dipertua*  
*Majlis Perbandaran Subang Jaya*